



U.S. EMBASSY  
Tirana, Albania



American  
Spaces



## MOBILE JOURNALISM- FROM CORNERS TO CITIES



# KURSET PRIVATE – Pro apo kundër?

BLOG

SHKRUAR NGA: Elena Kaloshi

Si një nxënës parauniversitar, mendoj që si shumica e nxënësve të tjerë, ndjek kurse private nga po të njëjtit mësues që edhe më japin mësim. Të jem realist, e kemi parë dhe kemi qenë vetë dëshmitarë që nxënësit që ndjekin një kurs të caktuar shikohen me një sy më ndryshe nga mësuesi ose marrin nota më të mira. Ndikimi i tyre në jetën e nxënësve është i madh, por mendoj se nuk duhet të fokusohemi vetëm tek gabimi i mundshëm i mësuesve që ofrojnë kurse private. Një pjesë të madhe të fajit mund ta kenë edhe vetë prindërit që i dërgojnë fëmijët e tyre në këto kurse të këtyre mësuesve. Për fat të keq, duhet ta pranojmë që shumicës së nxënësve iu pëlqen një ose dy nota më shumë se sa i meritojnë, madje edhe vetë prindërit kërkojnë nota më të larta për fëmijët e tyre, pavarësisht se mund të jenë të vetëdijshëm për kapacitetin dhe përkushtimin mbase jo të duhur të fëmijës së tyre.

Nga ana tjetër, është vështirë të mohohet se për nxënësit që synojnë të marrin informacion shtesë apo të fitojnë aftësi të reja, kurse private janë një ndihmë e madhe dhe këtë e them dhe nga përvoja personale. Pavarësisht se kurset mund të jenë një ndihmë shtesë për nxënësit, fakti që mësuesit tentojnë të kenë përfitime financiare nga nxënësit, tregohen të pabarabartë në vlerësim apo njohuri, i bën këto kurse të papranueshme dhe ndoshta në disa vende të botës, i bën edhe vepër penale. Edhe pse janë bërë përpjekje kundër këtyre padrejtësive dhe janë bërë përpjekje të ngrihet zëri kundër tyre, zëri ynë nuk dëgjohej dhe thirrjes tonë për ndihmë i përgjigjet një indiferencë kolektive. Thirrjet tona nuk janë marrë parasysh dhe përgjegjësinë kryesore e kanë institucionet përkatëse të bashkisë dhe qeverisë. Sa herë që kemi bërë thirrje, kemi protestuar duke sjellë edhe fakte dhe padrejtësitë kanë vazhduar të bëhen cdo ditë dhe e vetmja përgjigje që kemi marrë është se sot, ai që është i forti lejohet të bëjë gjithçka, të shtypë fjalën e lirë, të vrasë e të fitojë. Nuk është cudi që padrejtësitë po pranohen sepse jemi mësuar me zhgënjimin nga ata që supozohet të jenë shpëtimi dhe ndihma për cdo qytetar me të drejta dhe përgjegjësi të barabarta.